

Vorrede.

Sie ist Vhralt/ vnd bey den Vhralten in eygentlichem gebrauch auch gar
 hoch Existimirt worden/ wie dann auch hernach viel gewaltige Philoso-
 phi vnd fürtreffliche berühmte Medici, Araber/ Griechen vnd Latiner/
 bey Mannes gedencfen aber/ der von **G D E** hochbegabte vnd thewre
 Mann / Herz Philippus Theophrastus Bombast von Hohenheimb /
 Paracelsus genant/ auch etliche andere der Philosophy vnd beyder Arz-
 nen berühmte Doctorn/ viel von dieser Kunst geschrieben/ dieselbige re-
 staurirt, erläutert/ erkläret/ gebessert / vnd weiter fortgepflanzt haben/
 daß sie/ Gott lob/ bey vielen gar hohen Personen / vnd andern tapffern
 verständigen Leuten/ noch heutiges Tages in guter Achtung vnd Ge-
 brauch ist/ auch durch Gottes guädigen Beystand ferner zunemen/ vnd
 bis auff ihre Vollkommenheit wachsen wird. Vber diß wird sie auch von
 etlichen heyligen Altvätern/ vornemblich aber dem Augustino, hernach
 auch von fürtreffliche Theologen/ so fast zu vnsern Zeiten gelebt (die
 auch verstanden/ daß sie in der **H.** Schrift ihre fundamenta vnd Grün-
 de habe) gar höchlich commendirt, gelobet vnd gepreyset/ wie solches in
 ihren Schriften zu ersehen/ das die rechte Kunst Alchimien sey/ die war-
 hafftige Philosophia der Weysen/ die nicht allein viel vnd grossen Nuß
 hat/ vnd mit sich bringt/ vmb die Metallen zu schmelzen/ zuscheiden/ vnd
 sonst zu nuß zu machen/ Item/ dieselbigen/ so wol die Animalien/ vnd ih-
 re partes, auch Kräuter/ Wurzeln/ &c. jedes nach seiner Art zu sublimi-
 ren, destillirn, zur Arzney zu bringen / sondern daß sie auch allego-
 rien, vnd heimliche Deutungen in sich halte / die vberaus schön sind/
 Nemlich der Auferstehung am Jüngsten Tage/ vnd Verklärung vnser
 Leibe/ welche/ wann sie durch den zeitlichen Tod vnd Alembicum der Er-
 den/ mit dem herrliche/ vnd Gott allein bekanten Balneo destillirn, dar-
 auß wir/ als newgeborne Creaturen vnd Kinder Gottes werden herfür
 gehen/ von aller Unsauberkeit maligna ac venenata qualitate separirt,
 vnd das purum ab impuro geschieden/ daß wir gar span new / vnd super
 fein nunmehr geworden/ scheinen vnd leuchten werden wie die Sonne/
 Mond vnd Sterne.

Es